



830415

唐陸宣公文集卷之三

儀封張伯行孝先甫訂

受業

福安吳瑞馬

全校

漳浦蔡衍鏡

請以稅茶錢置義倉以備水旱

臣聞仁君在上則海內無餓殍之人豈必耕而餉之爨而食之哉蓋以慮得其宜制得其道致人於歛乏之外設備於災沴之前是以年雖大殺衆不懼夫水旱為敗堯湯被之矣陰陽相寇聖何禦哉所貴堯湯之盛者在於遭患


陸宣公文集

卷之三

一

正誼堂

能濟耳凡厥哲后皆謹循之故王制記虞夏殷周四代之法乃云國無九年之蓄曰不足無六年之蓄曰急無三年之蓄曰國非其國也周官司徒之屬亦云掌鄉里之委積以恤艱阨縣鄙之委積以待凶荒王制既衰雜以權術魏用平糴之法漢置常平之倉利兼公私頗亦為便隋氏立制始創社倉終於開皇人不饑饉貞觀初戴胄建積穀備災之議太宗悅焉因命有司詳立條制所在貯粟號為義倉豐則斂藏歉則散給歷高宗之代五六十載人賴其資國步中艱斯制亦弛開元之際漸復修崇是知儲積備災聖王之急務也語曰百姓足君孰與不足百姓不足君孰



與足此言君養人以成國人戴君以成生上下相成事如一體然則古稱九年六年之蓄者蓋率土臣庶通爲之計耳固非獨豐公庾不及編氓記所謂雖有凶旱水溢人無菜色良以此也後代失典籍備慮之旨忘先王子愛之心所蓄糧儲唯計廩庾犬彘厭人之食而不知檢溝壑委人之骨而不能恤亂興於下禍延於上雖有公粟豈得而食諸故立國而不先養人國固不立矣養人而不先足食人固不養矣足食而不先備災食固不足矣爲官而備者人必不贍爲人而備者官必不窮是故論德昏明在乎所務本末務本則其未自遂務末則其本兼亡國本於人安得

陸宣公文集

卷之三

二

正誼堂

不務頃以寇戎爲梗帥旅亟興惠恤之方多所未暇每遇陰陽愆候年不順成官司所儲祇給軍食支計苟有所闕猶須更取於人人之凶荒豈遑賑救人小乏則求取息利人大乏則賣鬻田廬幸逢有年纔償逋債歛獲始畢餼糧已空執契擔囊行復貸假重重計息食每不克儻遇薦饑遂至顛沛室家相棄骨肉分離乞爲奴僕猶莫之售或行丐鄙里或縊死道途天災流行四方代有率計被其害者每歲常不下一二十州以陛下爲人父母之心若垂省憂固足傷惻幸有可救乏之道焉可捨而不念哉今賦役已繁人力已竭窮歲汲汲永無贏餘課之聚糧終不能致將

樹儲蓄根本必藉官司助成陛下誠能爲人備災過聽愚計不害經費可垂永圖近者有司奏請稅茶歲約得五十萬貫元勅令貯戶部用救百姓凶饑今以蓄糧適副前旨望令轉運使總計諸道戶口多少每年所得稅茶錢使均融分配各令當道巡院王掌每至穀麥熟時卽與觀察使計會散就管內州縣和糴便於當處置倉收納每州令錄事叅軍專知仍定觀察判官一人與和糴巡院官同勾當亦以義倉爲名除賑給百姓已外一切不得貸便支用如時當大稔事至傷農則優與價錢廣其糴數穀若稍貴糴亦便停所糴少多與年上下准平穀價恒使得中每遇災

陸宣公文集

卷之三

三

正誼堂

荒卽以賑給小歉則隨事借貸大饑則錄奏分頒許從便宜務使周濟循環歛散遂以爲常如此則蓄財息債者不能耗吾人聚穀幸災者無以牟大利富不至侈貧不至饑農不至傷糴不至貴一舉事而衆美具可不務乎俟人小休漸勸私積平糴之法斯在社會之制兼行不出十年之中必盈三歲之蓄弘長不已升平可期使一代黎人永無餒乏此堯湯所以見稱於千古也願陛下遵之慕之繼之齊之苟能存誠蔑有不至

論兼并之家私歛重於公稅

國之紀綱在於制度商農工賈各有所專凡在食祿之家

不得與人爭利此王者所以節材力勵廉隅是古今之所
同不可得而變革者也代理則其道存而不犯代亂則其
制委而不行其道存則貴賤有章豐殺有度車服田宅莫
敢僭踰雖積貨財無所施設是以咸安其分罕徇貪求藏
不偏多故物不偏罄用不偏厚故人不偏窮聖王能使禮
讓興行而財用均足則此道也其制委則法度不守教化
不從唯貨是崇唯力是騁貨力苟備無欲不成租販兼并
下錮齊人之業奉養豐麗上侔王者之尊戶蓄羣黎隸役
同輩既濟嗜欲不虞憲章肆其貪恠曷有紀極天下之物
有限富室之積無涯養一人而費百人之資則百人之食
陸宣公文集

卷之三

四

正誼堂

不得不乏富一家而傾千家之產則千家之業不得不空
舉類推之則海內空乏之流亦已多矣故前代致有風俗
訛靡阡庶困窮由此弊也今茲之弊則又甚焉夫物之不
可掩藏而易以閱視者莫著乎田宅臣請又措其宅而勿
議且舉占田一事以言之古先哲王疆理天下百畝之地
號曰一夫蓋以一夫授田不得過於百畝也欲使人無廢
業田無曠耕人力田疇二者適足是以貧弱不至竭涸富
厚不至奢淫法立事均斯謂制度今制度弛紊疆理隳壞
恣人相吞無復畔限富者兼地數萬畝貧者無容足之居
依託強豪以爲私屬貸其種食賃其田廬終年服勞無日

休息罄輸所假常患不克有田之家坐食租稅貧富懸絕
乃至於斯厚歛促徵皆甚公賦今京畿之內每田一畝官
稅五升而私家收租殆有畝至一石者是二十倍於官稅
也降及中等租猶半之是十倍於官稅也夫以土地王者
之所有耕稼農夫之所爲而兼并之徒居然受利官取其
一私取其十穡人安得足食公廩安得廣儲風俗安得不
貪財貨安得不雍昔之爲理者所以明制度而謹經界豈
虛設哉斯道浸亡爲日已久頓欲修整行之實難革弊化
人事當有漸望令百官集議參酌古今之宜凡所占田約
爲條限裁減租價務利貧人法貴必行不在深刻裕其制

陸宣公文集

卷之三

五

正誼堂

以便俗嚴其令以懲違微損有餘稍優不足損不失富優
可賑窮此乃古者安富恤窮之善經不可捨也

右臣前月十一日延英奏對因叙賦稅煩重百姓困窮伏
奉恩旨令具條疏聞奏今且舉其甚者謹件如前臣聞於
書曰無輕人事惟難無安厥位惟危此理之所以興也又
曰厥後嗣王生則逸不知稼穡之艱難此亂之所由始也
以陛下天縱聖哲事更憂危夙夜孜孜志求致理往年論
及百姓必爲悽然動容每言朕於蒼生肢體亦無所惜臣
又叨近侍亟奉德音竊謂一代黔黎必躋富壽之域昨奏
人間疾苦十分纔及二三聖情已甚驚疑皆謂臣言過當

然則愁怨之事何由上聞煦育之恩何由下布典籍所戒信而有徵一鵬聖猷實可深惜臣又聞於書曰非知之艱行之惟艱竊惟陛下所以驚疑於微臣之言者但聞之未熟耳此乃股肱耳目之任仰負於陛下誠所謂知之非艱尙未足深累聖德也今則既知之矣願陛下勿復艱於所行居安思危億兆幸甚謹奏

論裴延齡姦蠹書

十一年三月具官臣某惶恐頓首獻書皇帝陛下臣聞君子小人用捨不並國家否泰恒必由之君子道長小人道消於是上下交而萬物通此所以爲泰也小人道長君子

陸宣公文集

卷之三

六

正誼堂

道消於是上下不交而萬物不通此所以爲否也夫小人之蔽明害理如目之有昧耳之有竟嘉穀之有蠹梁木之有蠹也跖離婁之目則天地四方之位不分矣克子野之耳則雷霆蠅黽之聲莫辯矣雖后稷之穡禾易長而蟲傷其本則零瘁而不植矣雖公輸之巧臺成九層而蠹空其中則圯折而不支矣是以古先聖哲之立言垂訓必殷勤切至以小人爲戒者豈將有意讐而沮之哉誠以其蔽主之明害時之理致禍之源博傷善之釁深所以有國有家者不得不去耳其在周易則曰大君有命開國承家小人勿用必亂邦也在尙書則曰除惡務本去邪勿疑在毛

詩則曰無縱詭隨以謹無良曾是培克歛怨以爲德盜言
孔耳亂是用餒譏人罔極交亂四國在論語則曰惡利口
之覆邦家者在春秋則曰聚歛積實不知紀極毀信廢忠
崇飾惡言靖譖庸回服讒蒐慝天下之人謂之四凶在禮
記則曰小人行險以僥倖長國家而務財用者必自小人
矣小人使爲國家而災害並至雖有善人無如之何臣頃
因讀書常憤此類不圖聖代日覩斯人戶部侍郎裴延齡
者其性邪其行險其口利其志凶其矯妄不疑其敗亂無
耻以聚歛爲長策以詭妄爲嘉謀以培克歛怨爲匪躬以
靖譖服讒爲盡節總典籍之所惡以爲智術冒聖哲之所

陸宣公文集

卷之三

七

正誼堂

戒以爲行能可謂堯代之共工魯邦之少卯伏惟陛下協
放勳文思之德而鑒其方鳩倖功體仲尼天縱之明而辯
其順非堅僞則天討斯得聖化允孚小往大來孰不欣幸
跡其姦蠹日長月滋陰秘者固未盡彰敗露者猶難悉數
今請粗舉數事用明欺罔大端悉非隱微皆可覆驗陛下
若意其負謗則誠宜亟爲辯明陛下若知其無良又安可
曲加容掩願擇左右親信兼與舉朝公卿據臣所言閱實
其事儻延齡罪惡無狀卽臣之奏議是誣宜申典刑以制
虛妄俾四海法朝廷之理兆人戴陛下之明得失之間其
體甚大不當復有疑慮使辯之不早以竟失天下之望也

前歲秋首班宏喪亡特詔延齡繼司邦賦數月之內遽銜
功能奏稱勾獲隱欺計錢二十萬貫請貯別庫以爲羨財
供御所須永無匱乏陛下欣然信納因謂委任得人旣賴
贏餘之資稍弘心意之欲興作浸廣宣索漸多延齡務實
前言且希睿旨不敢告闕不敢辭難勾獲旣是虛言無以
應命供辦皆承嚴約苟在及期遂乃搜求市鄽豪奪入獻
追捕夫匠迫脇就功以勅索爲名而不酬其直以和雇爲
稱而不償其傭都城之中列肆爲之晝閉興役之所百工
比於幽囚聚詛連羣遮訴盈路持綱者莫敢致詰巡察者
莫敢爲言時有致詰爲言翻謂黨邪醜直天子轂下囂聲
陸宣公文集

卷之三

八

正誼堂

沸騰四方觀瞻何所取則蕩心於上歛怨於人欺天陷君
遠邇危懼此其罪之大者也總制邦用度支是司出納貨
財太府攸職凡是太府出納皆稟度支文符太府依符以
奉行度支憑按以勘覆互相關鍵用絕姦欺其出納之數
則每旬申聞其見在之數則每月計奏皆經度支勾覆又
有御史監臨旬旬相承月月相繼明若指掌端如貫珠財
貨少多無容隱漏延齡務行邪諂公肆誣欺遂奏云左藏
庫司多有失落近因檢閱使置簿書乃於糞土之中收得
銀十三萬兩其匹段雜貨百萬有餘皆是文帳脫遺並同
已棄之物今所收獲卽是羨餘悉合移入雜庫以供別勅

支用者其時特宜進止悉依所奏施行太府少卿韋少華
抗表上陳殊不引伏確稱每月申奏皆是現在數中請令
推尋足驗姦計兩司既相論執理須辯鞫是非臣等具以
奏聞請定三司詳覆若左藏庫遺漏不謬隱匿固合抵刑
如度支舉奏是虛誣誑亦宜得罪陛下既不許差三司按
問又不令檢奏辯明度支言太府隱漏至多而少華所任
如舊太府論度支姦欺頗甚而延齡見信不渝枉直兩存
法度都弛以在庫之物爲收獲之功以常賦之財爲美餘
之費罔上無畏示人不慚此又罪之大者也國之府庫用
實貨財物合入官則納于其內事合給用則出乎其中所
陸宣公文集 卷之三 九 正誼堂

納無非法之財所出無不道之用坦然明白何曲何私而
延齡險猾售姦詭譎求媚遂於左藏之內彙建六庫之名
意欲別貯贏餘以奉人主私欲曾不知王者之監天下爲
家國不足則取之於人人不足乃資之於國在國爲官物
在人爲私財何謂贏餘復須別貯是必巧詐以變移官物
暴法以刻歛私財捨此二途其將焉取陛下方務崇信不
加檢裁延齡既怙寵私益復放肆遂錄積久逋欠妄云察
獲姦賊總計緡錢八百餘萬聽其言則利益雖大考其事
則虛誕自彰或是水火漂焚或緣旱澇傷敗或因兵亂散
失或遭寇賊斂數或准法免徵或經恩合放或人戶逃逆

無處追尋或綱典拘囚不免填納或沒入店宅歲久摧殘
或收獲舟船年深破壞類皆如此難以殫論在人者並無
可科徵屬官者悉不任貨賣但存名額虛掛簿書大抵錢
穀之司皆耻財物減少所以相承積累不肯滌除每當計
奏之時常充應在之數延齡苟稱察獲遂請徵收恢張利
門誘動天聽貽誚侮於方岳賈愁怨於烝黎于茲累年一
無所得其爲疎妄亦曰殆哉陛下姑欲保持曾無詰問延
齡謂能蔽惑不復懼思姦威旣沮於四方儉能復行於內
府由是蹂躪官屬傾倒貨財移東就西便爲課績取此適
彼遂號美餘愚弄朝廷有同兒戲諸州輸送布帛度支不
陸宣公文集

卷之三

十

正誼堂

務準平抑制市人賤通估價計其所折卽更下徵重困疲
阡展轉流弊旣彰忍害且示不誠及其支送邊州用克和
糴則於本價之外例增一倍有餘布帛不殊貴賤有異剝
徵罔下旣以折估爲名抑配傷人又以出估爲利事多矛
盾交駭物情窮邊稽夫痛憤切於骨髓下土編戶寃叫徹
於蒼旻而延齡以冒取折估爲公忠苟得出估爲賸利所
謂失人心而聚財賄亦何異割肢體以徇口腹哉殊不寤
肢體分披口安能食人心離析財豈能存此又罪之大者
也平原遠鎮扼制蕃戎五原要衝控帶靈夏芟夷榛蕪剪
迹豺狼崎嶇繕完功力纔畢地猶蔓絕勢頗孤危新集之

兵志猶未固尤資贍恤俾漸安居頻勅度支令貯軍食常使平涼有一年之蓄鹽州積半年之儲循環轉輸不得闕數近者二鎮告急俱稱絕糧陛下召延齡令赴中書遣希顏宣旨質問延齡確言饋餉不絕儲蓄殊多歲內以來必無闕乏希顏懼其推互邀令草狀自陳狀亦如言略無疑畏陛下覽其所奏翻謂軍吏不誠遂遣中官馳往檢覆道路無轉運之跡軍城無旬日之儲將卒嗷嗷幾將不守有如是之顛沛有如是之欺謾按驗旣明恩勞靡替其爲蠱媚曠代罕聞此又罪之大者也國之憲度會府是司位列諸郎猶應辰象任居六事實代天工內總轄於庶官外敷陸宣公文集

卷之三

七

正誼堂

化於列郡舉措繫生靈之命得失關理亂之源爲人軌儀安可容易未有大官弛縱而能使羣吏服從朝典凌遲而欲禁天下暴慢是以天寶將季揚國忠爲吏部尙書亟於私庭詮集選士果令逆豎得以爲詞史策書之足爲國耻而延齡放情亂紀又甚國忠懈於夙興多闕會朝之禮狗其鄙欲大墮省署之儀徒郎曹於里閭視公事於私第盡室飢官厨之饑填街持簿領之書復有諸部叅辭四方申請決遣查其判署去就俟其指揮延齡或聚客大誇不令白事或縱酒憑怒莫敢入言至有迫切而來逾旬未省輪納之後累月不歸資糧罄於滯淹筋力困於朝集晨趨夕

散十百爲羣里中喧闐常若闐闐衢巷列屠沽之肆邑居
成逆旅之津恣欲慢官唐人斲法求之今古鮮有其倫此
又罪之大者也總領財賦號爲殷繁自非識究變通智權
輕重大不失體細能析微濟之以均平准之以勤肅近無
滯事遠無壅情綱條之下無亂繩鑒照之內無隱匿然後
人不困而公用足威不厲而姦吏懲苟或未能則非稱職
况延齡以素所僻屨之質而加之以狂躁蒲盈旣惰且驕
事何由理遂以國家大計委於胥吏末流當給者無賄而
不支應徵者受賂而縱免紀綱大壞貨賂公行苟操利權
實竊邦柄近者度支小吏屢爲府縣所繩鞫其姦賊無不
陸宣公文集

卷之三

七

正誼堂

狼籍通結動連於節將交私匪止於苞苴威福潛移乃至
於是職司失序固亦可知此又罪之大者也風教之大禮
讓爲先禮讓之行朝廷爲首朝廷者萬方之所宗仰羣士
之所楷模觀而效焉必有甚者是以朝廷好禮則俗尙敬
恭朝廷尊讓則時耻貪競朝廷有失容之慢則凌暴之孽
播於人朝廷有動色之爭則攻鬪之禍流於下聖王知其
然也故選建賢德以爲公卿使人具瞻不論而化昔周之
方盛多士盈朝時靡有爭用能俾又故其詩曰慎爾出話
敬爾威儀無不柔嘉又曰有來雍雍至止肅肅相維辟公
天子穆穆言羣臣相與事上敬而能和言語動作靡有不

善也周德旣衰小人在位務相侵侮以至危亡故其詩曰
方懋爾惡相爾矛矣又曰旣之陰汝反予來赫又曰諒曰
不可覆背善詈言小人得志惡怒是憑肆其褊心以相詬
病也陛下勤修儀式以靖四方慎選庶官以貞百度內選
則股肱耳目外選則垣翰藩維濟濟師師咸欽至化庶相
感率馴致太和而度支憑寵作威恃權縱暴侵刻軍鎮墮
闕資糧將帥每使申論延齡率加毀訾或指誣隱盜或謗
訐陰私或數其出處賤微或臆其心志邪悖詞皆醜媒事
悉加誣匹夫見凌猶或生患况將帥素加委遇多著勳庸
縱有踰分取求但宜執理裁處苟當其所孰敢不從豈可
陸宣公文集

卷之三

七

三諫堂

遺每須載運軍資則令府縣差雇或有卒承別旨須赴促期遂於街市之間虜奪公私雜畜披猖頗甚費損尤多吏囚生姦人不堪命所減者則奏以爲利所費者則隱而不論破實徇虛多如此類度支應給宮內及諸司使芻藁薪炭等除稅草之外餘並市供所用旣多恒須貯備舊例每至秋穫之後冬收之時散開諸場逐便和市免費高價復資貧人公私之間頗謂兼濟延齡悉廢舊制但飾姦情旋計芻薪價錢以爲節減剝利及乎春夏之際藁枯已殫霖潦之中樵蘇不繼軍廩輟莖官厨待然告闕頻煩於聖聰徵催絡繹於省署崎嶇求買何暇計量糜損官錢不啻累

陸宣公文集

卷之二

十四

王苗堂

倍聯蹇狼狽率以爲常此則睿鑒之所明知物情之所深駭事之舛謬觸緒皆然臣愚以謂若斯之流不過歲費國家百萬緡錢及事體非宜耳其爲罪惡未足傾危事之可憂不在於此是以不復詳舉以煩聽覽也至如矯詭之態誣罔之辭遇事輒行應口便發靡日不有靡時不爲自非狀跡尤彰足致其禍者又難以備陳也延齡有詐僞亂邪之罪七而重之以耗數闕遺愚智共知士庶同憤以陛下英明鑒照物無遁情固非延齡所能蔽虧而莫之辨也或者聖旨以其甚招嫉怨而謂之孤貞可託腹心以其奸詐讒諛而謂之盡誠可寄耳目以其縱暴無畏而謂之強

可肅姦欺以其大言不疑而謂之智能可富財用將欲排衆議而收其獨行假殊寵而異其大成儻陛下誠有意乎在茲臣竊以爲過矣夫君天下者必以天下之心爲心而不私其心以天下之耳目爲耳目而不私其耳目故能通天下之志盡天下之情夫以天下之心爲心則我之好惡乃天下之好惡也是以惡者無謬好者不邪安在私託腹心以售其側媚也以天下之耳目爲耳目則天下之聰明皆我之聰明也是以明無不鑒聰無不聞安在偏寄耳目以招其蔽惑也夫布腹心而用耳目舜與紂俱用之矣舜之意務求己之過以與天下同欲而無所偏私由是天下陸宣公文集

卷之三

五

正誼堂

臣庶莫不歸心忠讜旣聞佞德逾邁故虞書云臣作朕股肱耳目又云明四目達四聰言廣大也紂之意務求人之過以與天下違欲而溺於偏私由是天下臣庶莫不離心險詖旣行昏德彌熾故商書云崇信姦回大雅云流言以對寇攘式內言邪僻也與天下同欲者謂之聖帝與天下違欲者謂之獨夫其所以布腹心而任耳目之意不殊然於美惡成敗若此相遠豈不以求過之情有異任人之道不同哉太宗嘗問侍臣何者爲明君何者爲暗主魏徵對曰君之所以明者兼聽也其所以暗者偏信也又曰秦之胡亥偏信趙高肆其姦欺卒至顛覆徵之此說理致甚明

簡冊備書足爲鑒戒趙高指鹿爲馬愚弄厥君歷代流傳
莫不痛憤陛下每覽前史詳考興亡固亦切齒於斯人傷
心於其主臣謂鹿之與馬物類猶同豈若延齡掩有而爲
無指無而爲有陛下若不以時省察得無使後代嗟詭又
甚趙高者乎斯愚臣所以焦慮疚懷以陛下爲過者良有
所以也夫理天下者以義爲本以利爲末以人爲本以財
爲末本盛則其末自舉末大則其本必傾自古及今德義
立而利用不豐人庶安而財貨不給因以喪邦失位者未
之有也故曰不患寡而患不均不患貧而患不安有德必
有人有人必有土有土必有財百姓足君孰與不足蓋謂
陸宣公文集卷之三

去 正龍堂

此也自古及今德義不立而利用克克人庶不安而財貨
可保因以興邦固位亦未之有焉故曰財散則人聚財聚
則人散與其有聚歛之臣寧有盜臣無令侵削兆庶以爲
天子取怨于下共有若此者行罰無赦蓋爲此也殷紂以
貪冒失人而亡周武以散發得人而昌則紂之多藏適所
以爲害已者之資耳尙何賴於財賄哉太宗亦云務蓄積
而不恤人甚非國家之計隋氏不道聚歛無厭所寶洛口
諸倉卒爲李密所利此則前代已行之明效聖祖垂裕之
格言是而不懲何以爲理陛下初膺寶曆志剪羣克師旅
繁興徵求寔廣權算侵剝下無聊生是以涇原叛徒乘人

怨咨白晝犯闕都邑眴庶恬然不驚反與賊衆相從比肩
而入宮殿雖蚩蚩之性靡所不爲然亦由德澤未浹於人
而暴令驅迫以至於是也于時內府之積尙如丘山竟資
寬渠以餌貪卒此時陛下躬親之矣是乃失人而聚貨夫
何利之有焉夫爲天子者以得人爲資以蓄義爲富人苟
歸附何患茂資義苟修崇何憂不富豈在貯之內府方爲
已有哉故藏於天下者天子之富也藏於境內者諸侯之
富也藏於困倉匿匱者農夫商賈之富也奈何以天子之
貴海內之富而猥行諸侯之棄德蹙守農商之鄙業哉陛
下若謂厚取可以恢武功則建中之取旣無成矣若謂多
積可以爲已有則建中之積又不在矣若謂徇欲不足傷
理化則建中之失傷已甚矣若謂斂怨不足致危亡則建
中之亂危亦至矣然而遽能靖滔天之禍成中興之功者
良以陛下有側身修勵之志有罪已悔懼之詞罷息誅求
敦尙節儉渙發大號與人更新故靈祇嘉陛下之誠臣庶
感陛下之意釋憾迴慮化危爲安陛下亦當爲宗廟社稷
建不傾不拔之永圖爲子孫黎元垂可久可大之休業懲
前事徇欲之失復日新盛德之言豈宜更縱儉邪復行刻
暴事之追悔其可再乎臣又竊慮陛下納彼盜言墮其姦
計以爲搏噬拏攫怨集有司積聚豐盈利歸君上是又大

繆所宜慎思夫人主昏明繫於所任咎繇夔契之道長而
虞舜享濬哲之名皇甫聚楸之變行而周厲嬰顛覆之禍
自古何嘗有小人柄用而災禍不及邦國者乎譬猶操兵
以刃人天下不委罪於兵而委罪於所操之主畜蠱以殃
物天下不歸咎於蠱而歸咎於所畜之家理有必然不可
不察臣竊慮陛下以延齡之進獨出聖衷延齡之言多順
宸旨今若以罪寘辟則似爲衆所擠故欲保持用彰堅斷
若然者陛下與人終始之意則善矣其於改過不吝去邪
勿疑之道或未盡善焉夫人之難知著自淳古試可乃已
載於典謨陛下意其賢而任之知其惡而棄之此理之常
陸宣公文集

卷之三

六

正誼堂

于何不可儻陛下猶未知惡但疑見擠固有象恭挾詐之
人亦有黨邪害直之士所查考覈兩絕欺誣陛下以延齡
爲能愚臣以延齡爲罪能必有跡罪必有端陛下胡不指
明其所效之能以表忠賢按驗其所論之罪以考虛實與
衆同辯示人不私若能跡可稱而罪端無據則是黨邪害
直之驗也陛下當繩其傷善以勵事君罪端有徵而能跡
無實則是象恭挾詐之驗也陛下當糾其包禍以戒亂邦
如此則上之於下釋嫌構之疑下之於上絕偏惑之議何
必忠邪無辯枉直莫分薰蕕同藏其臭終勝此則小人道
長之象也實時運否泰安危之所繫豈但有虧聖德不利

善人而已乎陛下若以必與已同者爲忠良自我作者無
改變如此則上之所欲莫不諂上之所失莫不從水火相
濟不爲非金礪相須不爲是耻過作非不足戒捨已從人
不足稱惟意是行則匡輔或幾乎息矣匡輔息則理不可
致仲尼所謂一言喪邦者在於予之言而莫予違也事關
興亡固不可忽希旨順默浸已成風獎之使言猶懼不旣
若又阻抑誰當貢誠伏恐未亮斯言請以一事爲證只如
延齡克妄流布寰區上自公卿近臣下逮輿臺賤品諠譁
談議億萬爲徒能以上言其人有幾陛下誠令親信博採
輿詞叅校比來所聞足鑒人間情僞臣以卑鄙任當台衡
陸宣公文集

卷之三

九

正誼堂

旣極崇高又承渥澤豈不知觀時附會足保舊恩隨衆沉
浮免貽厚責謝病黜退獲知幾之名黨姦苟容無見嫉之
患何急自苦獨當豺狼上達懽情下餌讒口良由內顧庸
昧一無所堪夙蒙眷知唯在誠直綢繆帳屨一紀于茲聖
慈旣以此見容愚臣亦以此自負從陛下歷播遷之艱危
親陛下致興復之艱難至今追思猶爲心悸所以畏覆車
而駭懼慮毀室而悲鳴蓋情激于衷雖欲罷而不能自默
也因事陳執雖已頻繁天聽尙高未垂諒察輒申悃欵以
極愚誠憂深故語煩懇迫故詞切以微臣自固之謀則過
爲陛下慮患之計則忠糜軀奉君非所敢避沽名銜直亦

不忍爲願迴睿聰爲國熟慮社稷是賴豈唯微臣不勝荷
恩報德之誠謹昧死奉書以聞臣誠惶誠恐頓首再拜

重論尊號狀

右冀寧奉宣聖旨卿所商量加尊號事雖則理體甚切然
時運必須小有改變亦不可執滯不信卿宜爲朕更審思
量應亦無妨者臣聞德合天者謂之皇德合地者謂之帝
德合人者謂之王父天母地以養人理物各得其宜者謂
之天子是皆至尊之殊號極美之大名雖欲變更無踰於
此故伏羲神農黃帝堯舜自生人已來君德之最神聖者
也天下尊之美之亦已至矣而其指以爲號者或曰皇或

陸宣公文集

卷之三

三

正誼堂

曰帝唯是一字且猶不兼禹湯繼興莫匪大聖尙自菲薄
降號爲王嬴秦德衰於殷周而名竊於義皞兼皇與帝始
總稱之流及後代昏僻之君乃有聖劉天元之號是知人
主輕重不在名稱崇其號無補於徽猷損其名不傷於德
美然而損之有謙光稽古之善崇之獲矜能納諂之譏得
失不侔居然可辯况今時遭屯否事屬艱難尤宜懼思以
自貶抑必也俯稽術數須有變更與其增美稱而失人心
不若黜舊號以祇天戒天時人事理必相扶人旣好謙天
亦助順陛下誠能斷自宸鑒渙發德音引咎降名深自尅
責唯謙與順一舉而二美從之外可以收物情內可以應

元運上可以高德於震古下可以垂法於無窮與廢典矯舊失至明也損虛飾收美利大智也前聖之所以永保鴻名常爲稱首者達於茲義而已矣陛下何恡而不革反欲加冗號以受實患哉道德經曰王侯自謂孤寡不穀以賤爲本也周襄王遭亂出居於鄭告於諸侯曰不穀不德鄙在鄭地春秋美之以其能降名也漢光武詔令上書者不得言聖史冊稱之以其能損已也臣願以賤微獲承訪議伊尹耻其君不如堯舜臣亦耻之是以誠發於中不復防慮忌諱赦其愚而鑒其理惟明王行焉謹奏

請數對羣臣兼許令論事狀

陸宣公文集

卷之三

三

正誼堂

朝隱奉宣聖旨頻覽卿表狀勸朕數對羣臣兼許令論事辭理懇切深表盡忠朕本心甚好推誠亦能納諫但緣上封事及奏對者少有忠良多是論人長短或探朕意旨朕雖不受讒譖出外卽妄生是非以爲威福朕往日將謂君臣一體都不隄防緣推誠信不疑多被姦人賣弄今所致患害朕思亦無他故却是失在推誠又諫官論事少能慎密例自矜銜歸過於朕以自取名朕從卽位以來見奏對論事者甚多大抵皆是雷同道聽塗說試加質問卽便辭窮若有奇才異能在朕登惜拔擢朕見從前已來事祇如此所以近來不多取欠對人亦不是倦於接納卿宜深悉

此意者聖德廣大如天包容俯矜狂愚仍賜獎諭嘉臣以懇切目臣以盡忠雖甚庸駑實懷感勵夫知無不言之謂盡事君以義之謂忠臣之夙心久以自誓以此爲奉上之道以此爲報主之資幸逢休明獲展誠願旣免罪戾又蒙褒稱庶奉周旋不敢失墜儻陛下廣推此道施及萬方咸獎直以矜愚各錄長而捨短人之欲善誰不如臣自然聖德益彰羣心盡達愚衷懇懇實在於斯睿眷特深屢宣宥旨備皆物理曲盡人情其於慮遠防微固非常識所逮然臣竊謂天子之道與天同方天不以地有惡木而廢發生天子不以時有小人而廢聽納帝王之盛莫盛於堯雖四

凶在朝而僉議靡輟故曰惟天爲大惟堯則之是知人有邪直賢愚在處之各得其所而已必不可以忠良者少而闕於詢謀獻納之道也昔人有因噎而廢食者又有懼溺而自沉者其爲矯枉防患之慮豈不過哉願陛下取鑒於茲勿以小虞而妨大道也臣聞人之所助在乎信信之所立由乎誠循誠於中然後俾衆無惑存信於己可以教人不欺唯信與誠有補無失一不誠則心莫之保一不信則言莫之行故聖人重焉以爲食可去而信不可失也又曰誠者物之終始不誠無物物者事也言不誠則無復有事矣匹夫不誠無復有事况王者賴人之誠以自固而可不

誠於人乎陛下所謂失於誠信以致患者臣竊以斯言爲過矣孔子曰可與言而不與之言失人不可與言而與之言失言智者不失人亦不失言由此論之陛下可審其所言而不可不慎信其所與而不可不誠海禽至微猶識情僞含靈之類固必難誣前志所謂衆庶者至愚而神益以蚩蚩之徒或昏或鄙此其似於愚也然而上之得失靡不辯上之好惡靡不知上之所秘靡不傳上之所爲靡不效此其類於神也故馭之以智則人詐示之以疑則人偷接不以禮則徇義之意輕撫不以恩則效忠之情薄上行之則下從之上施之則下報之若響應聲若影從表表枉陸宣公文集

卷之三

三

正誼堂

則影曲聲淫則響邪懷鄙詐而求顏色之不形顏色形而求觀者之不辨觀者辨而求衆庶之不惑衆庶惑而求叛亂之不生自古及今未之得也故唯天下至誠爲能盡其性能盡其性則能盡人之性若不盡於己而望盡於人衆必給而不從矣不誠於前而曰誠於後衆必疑而不信矣今方岳有不誠於國者陛下則興師以伐之臣庶有虧信於上者陛下則出令以誅之有司順命誅伐而不敢縱捨者蓋以陛下之所有責彼之所無故也向若陛下不誠於物不信於人人將有辭何以致討是知誠信之道不可斯須去身願陛下慎守而行之有加恐非所以爲悔者也臣

聞春秋傳曰人誰無過過而能改善莫大焉易曰日新之謂盛德禮記曰德日新日日新又日新商書仲虺述成湯之德曰用人惟已改過不吝周詩吉甫美宣王之功曰衮職有闕惟仲山甫補之夫禮易春秋百代不刊之典也皆不以無過爲美而謂大善盛德在於改過日新成湯聖君也仲虺聖輔也以聖輔而贊揚聖君不稱其無過而稱其改過周宣中興之賢主也吉甫文武之賢臣也以賢臣而歌誦賢主不美其無闕而美其補闕是則聖賢之意較然著明唯以改過爲能不以無過爲貴蓋爲人之行已必有過差上智下愚俱所不免智者改過而遷善愚者耻過而陸宣公文集

卷之三

五

正誼堂

雍熙之化沒齊堯舜之名向若太宗徇中主之常情滯習俗之凡見聞過則羞已之短納諫又畏人之知雖有求理之心必無濟理之效雖有悔過之意必無從諫之名此則聽納之實不殊隱見之情小異其於損益之際已有若此相懸又况不及中才師心自用肆於人上以遂非拒諫孰有不危者乎且以太宗有經緯天地之文有底定禍亂之武有躬行仁義之德有理致太平之功其爲休烈耿光可謂盛極矣然而人到於今稱詠以爲道冠前古澤被無窮者則從諫改過爲其首焉是知諫而能從過而能改帝王之美莫大於斯陛下所謂諫官論事少能慎密例自矜銜陸宣公文集

卷之三

三

正誼堂

歸過於朕者臣以爲不密自矜信非忠厚其於聖德固亦無虧陛下若納諫不違則傳之適足增美陛下若違諫不納又安能禁之勿傳伏願以貞觀故事爲楷模使太宗風烈重光於聖代恐不可謂此爲歸過而阻絕直言之路也臣聞虞舜察邇言故能成聖化晉文聽輿誦故能恢霸功大雅有詢于芻蕘之言洪範有謀及庶人之義是則聖賢爲理務徇衆心不敢忽細微不敢侮鰥寡侈言無驗不必用質言當理不必違遜於志者不必然逆于心者不必否異於人者不必是同於衆者不必非辭拙而效速者不必愚言甘而利重者不必智是皆考之以實慮之以終其用

無他唯善所在則可以盡天下之理見天下之心夫人之常情罕能無惑大抵蔽於所信阻於所疑忽於所輕溺於所欲信既偏則聽言而不考其實由是有過當之言疑既甚則雖實而不聽其言於是有失實之聽輕其人則遺其可重之事欲其事則存其可棄之人斯亦苟縱私懷不稽皇極於以虧天下之理予以失天下之心故常情之所輕乃聖人之所重圖遠者先驗於近務大者必慎於微將在博採而審用其中固不在慕高而好異也陛下所謂比見奏對論事皆是雷同道聽塗說者臣竊以衆多之議足見人情必有可行亦有可畏恐不宜一槩輕侮而莫之省納

陸宣公文集

卷之三

美

正誼堂

也陛下又謂試加質問卽便辭窮者臣切恐陛下雖窮其辭而未盡其理能服其口而未服其心何以知其然臣每讀史書見亂多理少因懷感嘆嘗試思之竊謂爲下者莫不願忠爲上者莫不求理然而下每苦上之不理上每苦下之不忠若是者何兩情不通故也下之情莫不願達於上上之情莫不求知於下然而下恒苦上之難達上恒苦下之難知若是者何九弊不去故也所謂九弊者上有其六而下有其三好勝人耻聞過騁辯給銜聰明厲威嚴恣疆懷此六者君上之弊也諂諛顧望畏懷此三者臣下之弊也上好勝必甘於佞辭上耻過必忌於直諫如是則下

之諛諛者順旨而忠實之語不聞矣上聘辯必勦說而折人以言上銜明必臆度而虞人以詐如是則下之顧望者自便而切磨之辭不盡矣上厲威必不能降情以接物上恣愎必不能引咎以受規如是則下之畏慙者避辜而情理之說不申矣夫以區域之廣大生靈之衆多宮闕之重深高卑之限隔自黎獻而上獲覩至尊之光景者踰億兆而無一焉就獲覩之中得接言議者又千萬無一幸而得接者猶有九弊居其間則上下之情所通鮮矣上情不通於下則人惑下情不通於上則君疑疑則不納其誠惑則不從其令誠而不見納則應之以悖令而不見從則加之

信辭屈者理或未窮人之難知堯舜所病胡可以一酬一詰而謂盡其能哉以此察天下之情固多失實以此輕天下之士必有遺才臣是以竊慮陛下雖窮其詞而未窮其理能服其口而未服其心良有以也古之王者明四目達四聰蓋欲幽抑之必通且求聞已之過也垂旒於前黈纁於側蓋惡視聽之太察唯恐彰人之非也降及末代則反於斯聰明不務通物情視聽祇以伺罪釁與衆違欲與道乖方於是相尙以言相示以智相冒以詐而君臣之義薄矣以陛下性含仁聖意務雍熙而使至道未孚臣切爲陛下懷愧於前哲也古人所以有耻君不如堯舜者故亦以是爲心乎夫欲理天下而不務於得人心則天下固不可理矣務得人心而不勤於接下則人心固不可得矣務勤接下而不辨君子小人則下固不可接矣務辨君子小人而惡其言過悅其順已則君子小人固不可辨矣趣和求媚人之甚利存焉犯顏取怨人之甚害存焉居上者易其害而以美利利之猶懼忠告之不饒况有踈隔而勿接又有猜忌而加損者乎天生蒸人本以爲國人之有口不能無言人之有心不能無欲言不宣於上則怨讟於下欲不歸於善則湊集於邪聖人知衆之不可以力制也故植謗木陳諫鼓列爭臣之位置采詩之官以宣其言尊禮義安

誠信厚賢能之賞廣功利之途以歸其欲使上不至於亢下不至於窮則人心安得而離亂兆何從而起古之無爲而理者其率用此歟苟有理之之意而不知其方苟知其方而心守不一則得失相半天下之理亂未可知也其又違道以師心棄人而任己謂欲可逞謂衆可誣謂專斷無傷謂詢謀無益謂諛說爲忠順謂獻替爲妄愚謂進善爲比周謂嫉惡爲嫌忌謂多疑爲御下之術謂深察爲照物之明理道全乖國家之顛危可立待也理亂之戒前哲備言之矣安危之效歷代嘗試之矣舊典盡在殷鑒足徵其於措置施爲在陛下明識所擇耳伏願廣接下之道開壘

善之門弘納諫之懷勵推誠之美其接下也待之以禮煦之以和虛心以盡其言端意以詳其理不禦人以給不自銜以明不以先覺爲能不以臆度爲智不形好惡以招諂不大聲色以示威如權衡之懸不作其輕重故輕重自辨無從而詐也如水鏡之設無意於妍蚩而妍蚩自彰莫得而怨也有犯顏讜直者獎而親之有利口讒佞者疎而斥之自然物無壅情言不苟進君子之道浸長小人之態日消何憂乎少忠良何有乎作威福何患乎妄說是非如此則接下之要備矣其獎善也求之若不及用之懼不周如梓人之任材曲直當分如滄海之歸水洪涓必容能小事

則處之以小官立大勞則報之以大利不忌怨不避親不
抉瑕不求備不以人廢舉不以己格人聞其才必試以事
能其事乃進以班自然無不用之才亦無不實之舉如此
則獎善之道得矣其納諫也以補過爲心以求過爲急以
能改其過爲善以得聞其過爲明故諫者多表我之能好
諫者直示我之能賢諫者之狂証明我之能恕諫者之漏
泄彰我之能從有一干斯皆爲盛德是則人君之與諫者
交相益之道也諫者有爵賞之利君亦有理安之利諫者
得獻替之名君亦得採納之名然猶諫者有失中而君無
不美唯恐讜言之不切天下之不聞如此則納諫之德光
陸宣公文集

卷之三

三

正誼堂

必行之志有其志而無可致之資則臣固已從俗浮沉何
苦而汲汲如是惟陛下詳省所闕亟行所宜歸天下之心
濟中興之業此臣之願也億兆之福也宗社無疆之休也
謹奏

陸宣公文集

卷之三

三

三諍堂



陸宣公文集卷之三
三諍堂
三

唐陸宣公文集卷之四

壽寧柳 瑋

福安吳瑞焉

全枝

儀封張伯行孝先甫訂 受業

樂安原 敬

漳浦蔡衍錕

優卹畿內百姓并除十縣令詔

朕以薄德託於人上勵精思理期致雍熙鑒之不明事或
乘當百度多闕四方靡寧傷痍未瘳而征役洊起流亡既
甚而賦斂彌繁人怨聞上天災降下連歲蝗旱蕩無農收
惟茲近郊遭害尤甚豈非昊穹作沴深徹予衷踴踏憂慚
陸宣公文集 卷之四 一 正誼堂

罔知攸措今穀價騰踊人情震驚鄉閭不居骨肉相棄流
離殞斃所不忍聞公私之間廩食俱竭既無賑恤猶復徵
求財殫力疲繼以鞭箠徵則軍莫之贍厚歛則人何以
堪念茲困窮痛切心骨思所以濟浩無津涯補過實在於
增修救患莫如於息費致咎之本既由朕躬謝譴之誠當
自朕始宜令尚食每日所進膳各減一半宮人等每月惟
供給糧米一千五百碩其餘悉皆停省年食支酒料宜減
五百碩飛龍廐馬從今已後至四月三十日已前並減半
料京兆府百姓應差科徵配及和市和糴等諸色名目事
無大小一切並停公私債負容待蠶麥熟後徵收百司非

至切之務如追擾百姓及追勘徵收等色府縣並不須承
受其尋常訴訟非交相侵奪者亦不得爲理百姓及諸色
人等如能力行仁義均減有無調貸貧人全活數衆者府
司具事跡聞奏朕當授以官秩蠲其征徭如縣令勸導有
方流庸克濟至夏初以來類例勘會但戶口無減田疇不
荒亦以狀聞量加優獎百姓有迫於荒饑全家逐食者其
田宅家具樹木麥苗等縣司並明立簿書印記今所由及
近隣人同檢校勿容輒有毀損及典賣填納差科本戶却
歸使令復業夫致理之本必在於親人親人之任莫切於
令長導王者之澤以被於下求庶人之瘼以聞於朝得失
陸宣公文集

卷之四

二

正誼堂

之間所係甚大且一夫不獲辜實在予况百里之安危萬
人之性命付以長吏豈容易哉今甸內凋殘亦已大甚每
一興想盡然傷懷非慈惠不能卹疲疇非才術無以賑艱
食臺卽御史選重當時得不分朕之憂救人之弊昨者詳
延群彥親訪嘉猷尚書司勳員外卽竇申等十人咸以器
能理道精心究烝黎之疾苦知教化之宗源輟於周行往
漑通邑申可長安縣令鄭珣瑜可檢校吏部員外卽兼奉
先縣令韋武可檢校禮部員外卽兼照應縣令賈全可咸
陽縣令兼監察御史霍琮可華原縣令兼監察御史王倉
可檢校禮部員外卽兼昭應縣令李會可盩厔縣令兼監

察御史荀曾可三原縣令兼侍御史李繼可富平縣令兼
殿中侍御史其有散官封賜者並如故應畿內縣令俸料
宜准常叅官例均融加給涇陽縣令韋滌潔已貞明處事
通敏有禦災之術有字物之方人不流亡事皆辦集惟是
一邑之內獨無愁怨之聲古之循良何以過此就加寵秩
允叶前規可檢校工部員外郎無本官仍賜緋魚袋并賜
衣一襲絹百匹馬一匹嗚呼積行在躬雖微必著咨乃庶
尹其惟欽哉朕聞爲君者必擇人而官爲臣者罔擇官而
處弛張繫於理不繫於時升降在乎人不在乎位朕方抑
浮華以敦教稽言行以進人非次之恩以待能者彰善黜
陸宣公文集

卷之四

三

正誼堂

惡期於必行凡百君子各宜自勉

重優復興元府及洋鳳等州百姓詔

朕巡狩山南白春涉夏師旋殷會日費旣廣州閭杼軸歲
計其空東作妨時西戍罕望雖毘勉從事人不告勞而憫
悼積衷于實知愧昨者減其租稅優以復除庶乎有瘳汔
用小息洎駕言旋軫躬履畏途絕欄縈迴危棧綿亘時經
霖雨道阻且修工徒造舟縣人葺路靡幼靡耄莫獲寧居
而又齎負糗糧共備頓舍涉於千里飲我六師居人露處
以罔依宿麥過時而不獲覩茲妨奪彌增感傷前所復除
未足酬卹式敷惠澤以紓大勞其興元府除先優復外宜

更給復二年鳳州全放今年稅其興元府鳳州界內知頓
及修道路閣橋州縣官將士等並委嚴震類例功效具名
聞奏量與甄獎嗟乎古先哲王東征西怨顧予不德重以
勞人補賀錄勤是有申命長吏明加優諭稱朕意焉

冊淑妃王氏爲皇后文

維貞元二年歲次丙寅十一月丁亥十一日丁酉皇帝若
曰乾坤合德聖人則之惟帝承天惟后配帝嗣續百代母
臨萬邦位定于中而尊加於外德修諸已而化被於人御
于家邦所繫斯在三代崇替靡不由之予是以詢衆採賢
重難茲命中壺虛位於今歷年陰儀或虧宗事無王缺於

陸宣公文集

卷之四

四

正誼堂

典禮朕甚愧焉稱是徽章聿歸全德咨爾淑妃王氏天與
淳粹氣鍾元和含章在中發秀於外卓爾風操穆然容輝
周旋中規進退有度仁愛恭儉稟于生知詩書禮樂成自
師氏竭其孝敬祇事先朝承事無違克諧尊旨往居桂苑
淑聞已彰泊奉椒塗謙光載路言無伐善志在匿瑕柔嘉
自持喜愠莫見六宮攸序九族以親嘗屬艱迍累從行幸
思賢才以輔佐知臣下之勤勞庶績伊凝頗資內助永念
傾筐之志且懷求劍之情崇位長秋永懷盛典矧惟元子
貞我萬邦稽以馨章是宜從貴今遣攝太尉某官某持節
冊命爾爲皇后嗚呼敬哉王教之端始於內範風美關雎

之化雅詠思齊之德罔懈厥位忝于前修克念有終庶無後悔奉承休命可不慎歟

冊嘉誠公主文

維貞元元年歲次乙丑六月甲子朔十二日乙亥皇帝若曰王者以義睦宗親以禮敦風俗義之深實先於友愛禮之重莫大于婚姻故春秋書築館之儀易象著歸妹之吉予是用祇考令典率由舊章咨爾嘉誠公主孝友柔謙外和內敏公宮稟訓四德備修疏邑啓封命爲公主徽章所被禮實宣之今遣光祿大夫檢校司徒同平章事汧國公勉持節冊命爾惟欽哉下嫁諸侯諒惟古制肅雍之德見陸宣公文集卷之四五正誼堂美詩人和可以克家敬可以行已奉若茲道永孚于休懋敦王風勿墜先訓光膺盛典可不慎歟

冊蜀王妃文

維建中二年十一月某日皇帝若曰夫茂建親戚以敦族固本明慎選納以厚別蕃嗣寔人倫之始王教之端也朕奉若謨訓允求淑哲賢必有象鍾慶於令門姻不失親載光于戚里故某官駙馬都尉田擇交第若干女生稟柔惠習知禮則容德純脩孝睦洽聞可以叶美好迷輔成樂善是用使其官某持節冊命爲蜀王妃嗚呼敬之哉備禮以崇其好合起家而榮其爵位非義信不固非溫順不親克

恭匪懈則罔攸悔朕言必復可不慎歟

冊祀王妃文

維建中二年十一月某日甲子皇帝使其官持節冊命某官竇兢第若干女爲妃王妃曰嗚呼禮以大婚崇繼嗣本人倫之教詩言淑女配君子繫王化之綱蓋率人成風由內及外得不采嘉耦以固盤石刑閨門以御家邦詳求惟難歷選茲久時乃之擇得于舊姻柔婉稟乎天和禮樂成於家法明章婦順虔奉姆儀克茂鵲巢之規叶宣麟趾之美其祇膺嘉禮欽率內教淑慎厥心無替於後嗚呼可不慎歟

陸宣公文集

卷之四

六

正誼堂

告謝昊天上帝冊文

維貞元元年歲次乙丑十一月癸巳朔十一日癸卯嗣天子臣某敢耶告于昊天上帝顧惟寡昧不克明道不膺眷命俾作神主常恐獲戾上下而播災于人兢兢業業夙夜祇畏居位五祀德馨茂聞皇靈不歆是用大倣殷憂播蕩踰歷三時誠懼烈祖之耿光墜而不耀側身思咎庶補將來上帝顧懷誘衷悔禍勦兇慝之凌暴雪人神震憤耻舊物不改神心載新茲乃九廟遺休兆人介福以臣之責其何解焉間屬寇虞久稽告謝今近郊甫定長至在辰謹以玉帛犧齊粢盛庶品冀憑禋燎式薦至誠太祖景皇帝配

神作王尚饗

祭大禹廟文

維貞元元年某月某日皇帝遣某官以牢醴之奠敬祭于大禹之靈惟王德配乾坤智侔造化拯萬類於昏墊分九州於洪波經啓之功于今是賴巍巍蕩蕩無得而名顧以躬身辱承大寶時則異于今古道寧問于幽明雖依聖垂休諒非可繼而勤人勵已竊有所希迨茲八年理道猶昧沴氣鬱結降為災邦無宿儲野有餓殍上愧明哲下慚生靈夙夜憂惕如蹈泉谷所資漕運用拯困窮底柱之問河流迅激舟楫所歷罕能獲全爰命工徒鑿山開道避險從陸宣公文集卷之四

七

正誼堂

易涉安代危噉噉烝人俟此求濟仰祈幽贊以集丕功享于克誠庶荅精意

策問賢良方正能直言極諫科

皇帝若曰蓋聞上古至道之君垂拱無爲以臨海內不理而人化不勞而事成星辰軌道風雨時若邈乎其不可繼何施而臻此歟三代以來制作滋廣異文質之變明利害之鄉威之以刑道之以禮敦其俗而彌薄防其人而益偷豈澆淳必繫於時耶何聖賢間生而莫之振也朕祇膺累聖之業猥居兆人之上乾居克勵如恐失墜憂濟庶務夕惕晨興永惟前王之興謨是憲是則師大禹以崇儉法高

宗以求賢興夏啓之征作周文之罰旌孝悌舉直言養高年敦本業平均徭稅黜陟幽明勵精孜孜勤亦至矣然而浮靡不革理化不行暴亂不懲奸犯不息五教猶鬱七臣未臻鄉黨廢尚齒之儀烝黎無安居之志賦入日減而私室愈貧廉察日增而吏道愈濫意者朕不明歟何古今之事同而得失之效異也思欲剗革前弊創立新規施之於事而易從考之於文而有據脩陳本末將舉而行無或憚煩略於條對自頃陰陽舛候禋絜頻興仍歲旱蝗稼穡不稔上天作孽必有由然屢推凶災其咎安在傳曰時之不乂厥罰常陰又曰堯湯水旱數之常也二者乖及其誰云

陸宣公文集

卷之四

八

正誼堂

從今人靡蓋藏國無廩積朕屢延卿士詢訪謀猷至乃減冗食之徒罷不急之務旣聞嘉語亦已遵行而停廢之餘所費猶廣俟轉糧於江徼則遠不及期將搜粟於關中則撓而無獲節軍食則功臣懷怨省吏員則多士靡歸中心浩然罔知攸濟子大夫蘊蓄才器通明今古副我虛求森然就列匡朕之寡昧拯時之艱災畢志直言無有所隱

策問博通墳典達於教化科

皇帝若曰朕承祖宗之鴻烈獲至神器任太守重懼不克堪思與賢士大夫共康理道虛襟以佇側席以求而群議紛紛所見異指或牽古義而不變或趨時會而不經依違

以來七年於茲矣國制多缺朕甚惡焉今子大夫博習墳
典深明教化褒然充舉咸造于庭其極思精心以喻朕之
未悟仲尼叙禮樂刪詩書修春秋廣易道六經之教所尚
各殊豈學者修行理當區別將聖人立意本異宗源施之
於時孰爲先後考之於道何者淺深差次等倫指明其義
夫知本乃能通於變學古所以行於今今之教人則異於
是工祝陳禮樂之器而不知其情生徒誦禮樂之文而不
試以事欲人無惑其可得耶將革前非固有良術堯舜率
天下以義比屋可封桀紂率天下以暴比屋可戮然則上
之化下罔或不從而三仁四凶較然自異有教無類豈虛
陸宣公文集

卷之四

九

正誼堂

言哉作樂移風聞諸昔典夫至雅必淡至音希聲文侯列
國之賢君猶曰則惟恐窳剗彼流俗其能化乎將使天地
同和災沴不作黎人不變姦慝不萌何施何爲以致於此
王者制理必因其時故忠敬質文更變迭救三代之際罔
不由之自秦剗古法漢雜霸道紛淪千祀王教不興國家
接周隋之餘俗未淳一處都邑者利巧而無耻服田畝者
朴野而近愚尚文則彌長其澆風復質又莫救其鄙俗立
教之本將安所從自昔哲王惟以三正互用後之術士乃
言五運相生以漢應火行則周爲木德禮稱尚赤義例頗
乖永言於茲莫識厥理九流得失之論歷代興亡之由王

鄭識理之異同公穀傳經之優劣必精必究用沃虛懷

策問識洞豁畧堪任將帥科

皇帝若曰朕遐觀典謨詳求理道三代之際粲然可徵未嘗不文武並興農戰兼務故能居則足食動則足兵兵足則威食足則固威則暴亂息固則教化行理國之本實在於此秦漢已降王制不修選士廢射御之儀教人無蒐狩之禮郎戎者不知其稼穡力本者罕習於干戈於是異文武之人分農戰之道守則乏食征則鮮兵歷茲千年竟莫能復抑知者蓋寡將行之惟艱歟朕念之甚勤思繼前躅良以軍旅之士役戍靡寧勲庸旣多爵秩咸貴俾服田畝

陸宣公文集

卷之四

十

正誼堂

慮興怨咨仰給縣官不可勝計由是版圖日減阡陌歲荒水旱小愆廩餉咸竭欲使軍人悅歸於耜耒儒者無達於韜鈴田萊盡耕攻取必勝誘人孔易其術安施王者之師本於立德兵家之法方務出奇德以信成奇以詐勝理有違反將何適從宋襄成列而敗軍見嘉魯策韓信決囊以摧敵取貴漢朝然則喪國亡身豈霸王之道冒危乘厄非仁誼之心所宜討論以定褒貶夫衆寡不敵克必以謀樂生下齊孫子破楚魏武之勝袁紹宋高之滅姚泓成敗之由備陳本末古人有言曰誅伐不可偃於天下又曰善爲國者不師二端異焉其有深青子房序次兵法任弘論譔

軍書指明異同詳錄名氏想聞商畧擇善而行

答宰臣請復御膳表

嘗覽典謨每嘉儉德愛人惜費是朕素懷况大兵之餘繼以荒饉軍儲國計資用皆空洞戶疲吐膏澤已竭致人於此過實在予內懷憂慚躬自損貶今竟渠殘滅粟麥豐成皆祖宗垂休非寡薄所致矧乎邦畿之內餒殍猶多戎役之徒傷疲未復孜孜訓戒克已增修猶懼辱守寶圖罔荅玄祐豈宜暇逸以厚厥躬卿等誠在致君將順其美顧惟虛缺非所宜然

答百寮請復御膳表

陸宣公文集

卷之四

十一

正誼堂

頃者大勞不息至化未孚雨澤愆期蟲蝗爲害朕以銷災謝譴莫大於修誠節用愛人必先於克己顧慚愆咎躬貶膳羞下以均衆庶之憂上以答昊穹之儆至誠或感嘉應遂臻宿麥方成元克已殄慶深德薄惕厲彌加忽覽表章過爲稱述雖將順其美則曰乃誠而戒慎不忘諒惟朕志未喻來請深體此懷

蕭復劉從一姜公輔平章事制

宰輔之任獻替爲務內凝庶績外撫四夷調陰陽以成歲功贊化育而熙帝載若金用礪其礪予違如旱爲霖允從人望矧時屬多難彌切任賢朕未嘗不朝夕論思夢寐懷

想道之所在人遠乎哉朝議大夫守戶部尚書兼御史大夫克荆襄江西等道都元帥統軍長史豐縣開國公賜紫金魚袋蕭復性質端亮理識精敏約已弘物體方用圓爲邦必表其理能及雷亟聞於鯁議動可成範立不易方守尚書吏部郎中兼御史中丞克荆襄江西等道都元帥判官賜緋魚袋劉從一貞白其行溫恭其文居簡而適用必通禮和而臨事有立持重能斷端慤有恒累更委任多所弘益守京兆府戶曹叅軍翰林學士賜緋魚袋姜公輔志懷濟物監必通理主文而諫忠靡退言經始以謀事皆前定道無屈撓智適變通並可以叅贊大猷光膺僉屬兵戎

陸宣公文集

卷之四

七

正誼堂

未靖期爾經綸都邑未康期爾還定予一人有過爾是用匡伊萬姓不寧爾是用乂欽哉慎乃有位罔瘵厥官復可守吏部尚書同中書門下平章事散官封賜如故從一可守尚書刑部侍郎同中書門下平章事賜紫金魚袋公輔可守諫議大夫同中書門下平章事賜紫金魚袋

張延賞中書侍郎平章事制

兩漢致理由乎審官多以攷宰高第入居台輔黃霸自穎川而次遷丞相卓茂由密今而超拜三公蓋以爲國本於親人舉賢先於稱職旌能勸善風化大端今章車薦興賦頌人散匡弼寡昧屬于才臣光祿大夫檢校吏部尚書兼

成都尹御史大夫克劔南西川副大使管內度支營田觀察使處置等使上柱國魏國公張延賞崇飭文行勵精理道踐歷中外所至有聲慮必周密心無屈撓簡庶以肅吏慈惠以愛人明以照姦和以定衆去若始至久而見思秉志不渝課績常最以爾循良之化佐予綴兆人以爾經綸之才佐予熙庶績仍資威重兼領蕃維式慰甘棠之思且繼緇衣之美懋昭邦典勿替家聲可中書侍郎平章事依前無成都尹餘如故

劉滋崔造齊映平章事制

朕嗣位君臨精求理道小大之務靡不經心日慎一日于

陸宣公文集

卷之四

三

正誼堂

今八載教化未洽烝黎未康因之以甲兵繼之以災沴斯固鑒有所不至慮有所不周予深浩然若涉深水思所以匡我致理助我官人宣其澤而四方以寧執其要而百工式敘允是大任其惟輔臣夢想勞懷數求俊乂察言而觀行因事以考能周行之中乃得良弼權知吏部侍郎劉滋操履貞清介然自守居能慎獨重不違仁祈理究其精微勵學探於奧旨守給事中賜緋魚袋崔造性合道要誠通化源適時有成務之才事上懷匪躬之節蘊蓄器業居爲名臣中書舍人賜紫金魚袋齊映修己以立自明而誠體賢人可大之規用君子時中之道虛受能擇清通不流惟

滋之直方可以激風俗惟造之體度可以振條綱惟臆之精深可以該物理我有大典爾其參之懋昭厥猷勿替休聞滋可克散騎常侍同平章事造仍賜金魚袋其有散官封賜並如故

李納檢校右僕射平章事制

忠所貴乎竭誠善莫大於改過况茂勲有舊崇德日新翼戴勵勤王之節經綸申畫敵之畧敦獎之道時惟國章平盧縉青節度管內度支營田處置等使開府儀同三司檢校工部尚書使持節鄆州諸軍事兼鄆州刺史隴西郡王李納稟性端厚執心寬簡通變適用和順積中服勞王家陸宣公文集卷之四十四 正誼堂

夙有成績乘秋備塞克著威聲累歲專城載揚理行間者心懷險阻誠義鬱湮旋能歸欵上聞期於率德自效忠節純固久而益彰爰整銳師式遏亂畧保障宋服填壓浚郊巖如長城作固東土嘉乃率服之美懋乃輸力之勤擢升袞司載董戎翰玄成嗣台輔之業亞夫繼社稷之勳俾爾兼榮無替厥服檢校右僕射平章事餘如故

韓滉檢校左僕射平章事制

周召由輔弼之臣兼方伯之任蓋以理化根本在於親人通兆庶之情以佐天子秉冢邦之慶以臨諸侯故能中外允釐上下無壅今我有命意其在茲金紫光祿大夫檢校

尚書左僕射兼潤州刺史御史大夫克鎮海軍浙江東西
節度觀察處置等使上柱國南陽郡開國公韓滉文行忠
信備修身之道勤儉貞固有成務之才累更委遇多處繁
重一心奉職終始不渝內告謀猷以匡時化外持憲法以
一人心理尚廉平事皆釐飭奸盜衰息禮義興行惠茲一
方時乃之德陳師旅以遏寇讐納餽糧以修職貢張我威
武資我資儲今必應期謀無愆素濟于多難時乃之功宜
其參務中樞翼宣大化仍兼漕運兼領蕃維樹南國之風
猷贍中都之廩實予則有望爾其懋哉繼于前人無替厥
服可檢校左僕射同平章事依前鎮海軍浙江東西節度
陸宣公文集

卷之四

壹

正誼堂

觀察處置等使兼克江淮轉運使餘如故

李勉太子太師制

立國之本所繫於元良弘敷之方必由於端士非精識前
典德冠當時恭敬溫文其將安做吾是以輟台階之老選
宗室之賢輔翼春闈是資教諭檢校司徒同平章事克太
清官使崇文館大學士上柱國汧國公李勉忠信孝友直
方簡儉達君臣父子之際知禮樂教化之端虛澹保和貞
明寡欲求舊則德懋叙親則屬尊師範國儲無易其選可
檢校司徒兼太子太師散官封勳如故

姜公輔左庶子制

君之任臣有優賢賜告之義臣之事君有量力知止之道故能進退以禮終始可勝此朕三事大夫濟理圖全之意也守諫議大夫同平章事賜紫金魚袋姜公輔首舉高第擢居諫曹爰資美才叅掌密命居易勵修身之操見危著從我之勤自處台司累疏陳乞忌滿思退持盈守謙留中久之重難其請式光撫揖俾尹官坊可太子左庶子勳賜如故

崔造右庶子制

宰相之職允釐百工時惟仰成不可廢闕中散大夫行給事中同平章事上柱國安平縣開國男賜紫金魚袋崔造陸宣公文集卷之四十六 正誼堂頂居掖垣叅掌樞密總領繁重積勞疹深亦旣優賢賜之長告歲聿云暮有加無瘳披誠自陳章疏三上知止之道守之甚堅處以休閒俾遂願養可太子右庶子勳賜如故

盧翰太子賓客制

求賢審官以康庶績就閑優秩以處舊臣蓋欲敦終始之恩全進退之禮金紫光祿大夫行門下平章事范陽郡公盧翰頃因多難從我於征以其年及老成任推先進方將求舊擢處台衡荏苒迄今亟淹星歲勤勞旣久衰疾有加宜徙職於春闈用優賢於暮齒可太子賓客勳賜如故

賈耽東都留守制

河洛舊都時巡久曠命以居守俾之保綏間者淮甸不寧
汝墳屢警增置軍府作藩王畿職任旣分威望非重思有
總制一其典刑爰資信臣徃又東夏銀青光祿大夫守工
部尚書魏國公賈耽豁達貞方識通大體明九域山川之
要究五方風俗之宜恒因物情以施教化所蒞之郡霽其
休聲悅李廣之風人皆自便懷牟祐之德敵不敢侵自誠
而明在久彌著分我憂寄實惟其人董制軍師安集疲瘵
統禦都邑提持紀綱懋昭厥猷無替朕命可守本官兼御
史大夫克東都留守東都畿汝州都防禦觀察等使判東
都尚書省事散官勳封如故

陸宣公文集

卷之四

七

正誼堂

崔縱東都留守制

居守之重固難其人近歲以來益又繁翳領廉察之任專
禦備之權地廣務殷一皆咨稟非利用罔以通濟非純德
不能保綏周爰咨詢公論有屬銀青光祿大夫行尚書吏
部侍郎上柱國安平縣公崔縱素風自遠代濟忠貞慶之
所鍾繼有才哲氣質淳茂識度淹通蘊經遠之沉謀宣適
時之利用寬而不弛簡則能周以茲公方多歷要重小大
之務必聞休聲輟於周行式是東夏擢居春官之長且兼
副相之雄懋昭厥庸期復先構可檢校禮部尚書兼御史
大夫克東都留守判東都尚書省克東都畿汝唐鄧等州

都防禦觀察處置使散官勲封如故

曾王荆襄江西等道兵馬都元帥制

君人立極所務於勝殘秉律成師寔先於謀帥申明號令
總持紀綱弘九合之功決百勝之畧非慎簡不可以濟事
非僉屬不可以臨民集大勲者必舉於宏綱體至公者無
避於內舉爰擇蕃翰俾掌元戎開府儀同三司舒王謨性
稟忠厚訓知禮樂居常樂善動不遠仁察其內恕外溫必
能安人和衆體方識敏諒可成功庶乎知子之明授以貞
帥之律可揚州大都督持節克荆襄江西沔鄂等道節度
使及諸軍行營兵馬都元帥餘如故仍賜名諡改封曾王

陸宣公文集

卷之四

六

正誼堂

嗚呼小子諶其敬聽朕命我國家之有天下百七十載于
茲矣祖宗垂化紹統功德繼茂威加殊俗惠洽曾天海隅
蒼生代受亭育躋之於福壽煦之以仁和源廣流長慶深
祚遠曆數有嗣纘于朕躬兢兢業業懼不負荷虔恭寅畏
歲五周星循列聖之耿光稽上古之謨訓一物失所是用
疚心萬方有罪每懷咎已懸法皆考於天則舉事必酌於
人謀期合大中罔循私欲而涉道猶淺燭理未明文闕於
化成武乏於定亂刑賞失中授任乖方厚澤未均大信未
著致使克慝熾禍于紀亂常悖違君親蔑棄天地盜據我
都邑痛毒我士庶驅脅丁壯暴骸於原野攘奪羸老轉死

於溝壑忠良隕命義烈銜冤迫以克殘莫由自奮憤深骨
髓怨結蒼旻朕所以中宵屢興終食三歎哀蒼生之無告
憫赤子之非辜爲人父母寧忘愧悼賴三事大夫竭誠於
內群帥爪牙宣力於外交修不逮日冀康寧江漢上游建
旆制寇亘千里之地連十萬之師保大定功宜有統壹允
副茲選往哉汝諧無以貴驕人無以善自伐無縱已之慾
無拂衆之謨從諫如流改過勿吝卑躬降志以奉實傳絕
其分少以撫軍師布誠信以歸人心明賞罰以盡士力詰
姦誅暴懋昭乃勲敬事恤人無替朕命膺茲重任可不勉
歟建中四年九月二十六日

陸宣公文集

卷之四

九

正宣堂

李晟鳳翔隴西節度兼涇原副元帥制

周之元老以分陝爲重漢之丞相以憂邊見稱故方岳克
寧疆場不聳安人保大致理之端今所以重煩上台作鎮
西土奉天定難功臣司徒兼中書令克神策軍節度鄜坊
丹延等州觀察處置等使乃京畿渭北鄜州華州兵馬副
元帥上柱國合川郡王李晟勵精剛之操體博大之德適
時通變而大節不奪虛受廣納而獨斷自明奉法以身推
功以下衆無犯命人用樂從懷德畏威今行禁止誓群帥
於危疑之際駐孤軍於版蕩之中氣凌風雲誠動天地一
鼓而克徒懾比再駕而都邑廓清師皆如歸人不知戰再

安社稷功格皇天而明識秉彝清風激俗雅尚恬曠撫諭
有光朕以汧隴近郊扶風右地川阜連亘抵於回中限界
諸藝蕃屏王室所屬誠重付之元臣兼二將之甲兵崇十
連之元帥宣威耀武罷警息兵俾予仰成時乃丕烈可兼
鳳翔尹克鳳翔隴右節度營田觀察處置等使仍克鳳翔
隴右涇原節度管內諸軍及四鎮北亭副元帥西平郡王
渾瑊京畿金商節度使制

王者之制安不忘危弘其道則文武齊致教其人則農戰
兼務故雖縣內不可去兵况密邇寇虞千紀稔惡都邑郊
甸騷然靡寧聿求信臣特建戎號濟人夷難允屬勲賢京

陸宣公文集

卷之四

二

正誼堂

畿渭北節度使兵部尚書行在左都虞侯渾瑊忠貞博厚
溫恭簡肅持重不撓奸謀而成居業克敦其詩書受賜每
陳於廊廡能推誠而撫下不伐己以拒人委任中外咸著
聲績夷險一貫隱然殿邦朕越在郊垌偏於克醜授之師
律式是戎昭侍衛增嚴斥埃無爽檢身齊衆同士伍之勞
苦致陣整旅壯行列之威容靜以伐謀動而制勝臨危勵
節予有賴焉王圻之內沃壤千里綿亘商嶺屏於南門觀
風靖人詰禁誅暴俾爾兼領用孚于休可京畿渭北渭南
金商節度觀察處置等使餘並如故

杜亞淮南節度使制

淮海與區一方都會兼水陸漕輓之利有澤澳山代之饒
俗具五方地綿千里聿求良牧豈易其才今又革車方興
軍賦屢調體於寬大則事缺務於辦集則人殘自非剛柔
適中文武兼備其何以副我憂屬惠綏南方正議大夫行
尚書刑部侍郎上柱國扶風縣開國男杜亞識精體要學
究宗源妙於用而有常通其變而能久爲理敦教化之本
立言叅禮法之中道無緇磷行有枝葉回翔省闈表彌綸
獻納之勤踐歷方州著清淨循良之稱其嚴重可以鎮俗
其才術可以匡時休有令聞輝映朝列朕以東南思又注
意求賢爰輟名臣俾寧藩服往率厥職時惟欽哉可揚州
陸宜公文集

卷之四

三

正誼堂

大都督府長史兼御史大夫克淮南節度觀察處置等使
度王申光隨蔡等州節度使制

自昔哲王疆理天下必選其明德赫之宗親叅制藩維夾
輔王室賢戚並建時惟休哉長淮之西厥壤千里人靡寧
息于茲有年朕其永懷慘若焚灼思得良帥代予安人釋
其危疑彰我信惠以親而授其在於茲開府儀同三司度
王諒性本溫恭生知忠孝祇服訓導躬行不渝言皆副誠
事必求當端慎可以鎮俗寬厚可以長人底綏一方庶允
憂屬可申光隨蔡等州節度副大使管內觀察處置等使
餘如故

韓滉加檢校右僕射制

周制以輔翼之臣出作方伯漢官以牧守之最擢拜公卿其在匡時中外同體朕以大勞未久勤郵於黎元多難薦興注意於藩岳就加命服式寵能賢則增秩進律亦古之道也金紫光祿大夫檢校吏部尚書使持節潤州諸軍使兼潤州刺史御史大夫克鎮江軍浙江東西節度觀察等使韓滉忠肅剛直清公簡儉持至公以檢下強禦必繩秉大節以事君險艱無易惠能恤衆明足照姦歲發勤王之師日增贍國之賦軍無撓敗俗以阜康殿于大邦理平訟息朝有勸典昭升乃庸胙土以報勤懋官以旌德底又江陸宣公文集

卷之四

三

正誼堂

甸永孚于休可檢校尚書右僕射進封昌黎縣開國公餘如故

嘉王橫海軍節度使制

度土分疆設官蒞事因時設制期在理安必順物宜且從人欲版圖旣溢則疏邑以制州統攝或乖則分部而建長公革之道亦何常哉滄海之隅地饒俗阜隱然北土實曰雄藩鎮撫之宜是資懿戚開府儀同三司嘉王運氣本元淳重承先訓忠肅孝友寬仁惠和勤於服儒樂在爲善施於事任必有可觀舉不失親至公斯在欽率厥職永孚於休可橫海軍節度使滄景等州觀察處置等使勳封如故

韓滉度支鹽鐵轉運等使制

食貨所資邦家大本總領之重必推元臣故周以冢宰制國用漢以丞相調軍食官給人足謂之善經今戶口凋傷財產衰耗邊疆未靖役費尙多思欲均原澤之征權重輕之制國無匱乏人不怨咨運籌佐時其在良輔金紫光祿大夫檢校尙書左僕射同中書門下平章事克鎮海軍浙江東西節度兼江淮轉運等使晉國公韓滉昔事先朝常掌邦賦貞心獨立一志在公吏無姦欺財以饒羨自臨江甸事舉風行職貢有加轉餉相繼成功允集艱食用康介于方隅未極材術宜其弘濟式副具瞻可克度支及諸道

陸宣公文集

卷之四

三

正誼堂

鹽鐵轉運等使餘如故

李叔明右僕射制

行止兩全必惟明哲致其用以匡國敦乎道以保身周旋令名始終不替斯賢者極致而行之實難金紫光祿大夫守太子少傅檢校尙書右僕射持節梓州諸軍事兼梓州刺史御史大夫克劍南東川節度副大使知節度事管內度支觀察處置等使蘓國公李叔明稟粹挺生鬱爲邦傑虛懷朗暢達識周通早以器能累更任遇中外所踐必聞休聲嘗尹京師茲臺屏息泊臨方岳風俗澄清吏服嚴明人懷德惠憂公奉職勵節存誠服勞王家行及三紀以茲盡

瘁沉恙所嬰扶疾趨朝披誠告老固陳衰瘵深戒滿盈情
皆發衷語且形泣視其激切良所軫懷敦勸既頻辭乞彌
固繼獻章疏期於必從省之憮然用增感歎雖惜其舊德
往泣遐藩而憫以高年難違懇志猶資碩望俾長庶寮罷
方鎮之煩總中臺之重式彰尙德且示優賢可依前守太
子少傅兼尙書右僕射

李澄贈司空制

旣明且哲以保其身求之昔賢鮮克全備良以謀始匪易
慎終尤難其有志奉公家力輔王室見危而立節將沒而
陳誠操尙堅明謀猷深遠憂國無忘於顛沛周身不離於
陸宣公文集

卷之四

三

正誼堂

今名有臣如斯可以旌勸故義成軍節度滑鄭等州觀察
處置等使開府儀同三司檢校尙書右僕射兼滑州刺史
御史大夫上柱國武威郡王李澄天授將材勇而多智臨
危不懼見義必爲疇嘔險艱勲節兼著勤於廣業曾未遑
安帶甲臨戎連年野處積勞成瘁霜露所侵瘠疾攻中癰
疽發外迫茲病亟不替忠誠憂國疚懷繼闕流涕懼軍戎
之乏帥念方鎮以爲虞上表披陳懇求代免辭情激切備
慮精深視之感傷當宁興歎雖史魚之陳尸納諫吳漢之
在疚獻謀比方於此不足多尚天胡不容奪我良帥惻然
嗟悼用切深衷始終存義澄實有之褒美飾終是宜加等

可贈司空賜物五百段米粟三百石以左散騎常侍歸崇
敬克使弔祭所絲喪塋堊准式官供仍以澄上表宣付史
館以彰忠節

除鄧州歸順官制

迫以克威陷于寇境義不受汚忠能奮誠履重險而不回
處疾風而逾勁忘軀狗義獻欵投誠足以勵彼勤王激其
汚俗去逆效順固先典之攸嘉懋賞勸功驗彞章而不昧
咸從序用俾服官常可依前件

云

云

李納檢校司空制

鄭武公父子繼爲周司徒內居股肱外作藩翰詩美緇衣
陸宣公文集

卷之四

三

正誼堂

之德傳稱夾輔之勲我懷斯人今得良弼開府儀同三司
檢校尚書右僕射同中書門下平章事克平盧淄青節度
管內度支營田觀察處置陸運海運押新羅渤海兩蕃等
使隴西郡王李納宇量宏博質性沉毅體仁能斷見善必
遷蘊非常之才守以純一秉難奪之節著于艱危昭升今
聞茂建勲績屬淮夷構亂東夏震騷奮旅徂征坐籌制勝
解商丘之難攘彼克殘釋陳城之危俘厥渠帥德功克懋
官賞宜崇庸建上台宜賜眞食惟乃先服勤勞王家以殿
邦之勲叅論道之職俾爾嗣績光于前人荷國之寵章承
家之不構敬慎厥德永孚于休可檢校司空同中書門下

平章事仍賜實封五百戶餘並如故

賜李紳王武俊等鐵券文

維興元元年歲次甲子正月癸酉朔二日甲戌皇帝咨爾
某官某嗚呼王者所以撫人失於所撫則叛下者所以奉
上失於所奉則刑各當其理德用不擾各違其分亂於是
生朕德薄化淺昧於君道罔知省己姑務責人是以徵師
徂征連歲靡息惟爾以誠志之不達反仄于厥衷阻衆興
戎結黨拒命豈非上失於所撫而下失於所奉歟書曰萬
方有罪罪在朕躬我實不德兆人何咎俾廢其生業離於
室家陷于困窮死于戰陣老疾廢養孤惻靡依怨結蒼生
陸宣公文集 卷之四 三 正誼堂

感傷和氣朕爲人父母得不愧于心哉晨興以思夕惕以
悼自嗣位迄今六載天將悔禍朕方覺悟爾亦知衆心之
厭亂思所以保安叶于朕懷若應符契非天地合德人神
合謀將茂育群生則何以臻此朕是用上順天意俯從人
心滌爾疵瑕復爾爵位坦然靡阻君臣如初功載罔彝名
藏王府子孫代代爲國勲臣山河帶礪傳祚無絕朕方布
大信承天子人若食其言何以享國嗚呼其祇若命用保
無疆之休

